

'Ana'ana-māite-ra'a i roto i te Repūpirita Tchèque

Ha'aputuputuhia e Sharon Goodrich, te mau Vē'a 'a te 'Ēkālesia.

E mau tamari'i Paraimere mātou i roto i te Repūpirita Tchèque Teie te huru e 'ana'ana māite ai mātou i roto i tō mātou fenua.

I te pae tātahi, 'ua ha'amata te ra'i i te fa'arumaruma. 'Ua pa'a'ina te mata'i 'e 'ua pūai te miti ! 'Ua tupu mai te pātiri, te uira, 'e te ua pa'ari. 'Ua horo pā'ato'a te ta'ata nō te pāroru ia rātou. 'Aita mātou i pēpēhia e te vero. I tō mātou ho'ira'a atu i te fare, 'ua 'ite mātou e toru ānuanua. 'Ua 'ite mātou ē 'ua tauturu 'e 'ua pāroru te Atua ia mātou.

Jakub B., 10 matahiti



I te hō'ē taime 'ua mo'e tō'u rimarima au-roa-hia e au. 'Ua 'oto roa vau. 'Ua pure māua tōu metua vahine, 'aita rā te reira i 'itehia mai e māua. 'Ua tāmata vau e fa'a'ohipa i te fa'aro'o. Hō'ē hepetoma i muri mai, 'ua 'ite tō'u teina iti i tōu rimarima i ni'a i te porōmu. E pāhono te Atua i tā tātou pure. 'Ua here au iāna, 'e 'ua 'ite au e tē ora nei 'oia !

Andre W., 9 matahiti



I te fare ha'api'ira'a tē vai nei tō'u hō'ē hoa e 'aita roa atu te hō'ē pīahi e hina'aro i te fa'ahoa atu iāna. 'Ua ha'amata te tahi atu mau tamari'i i te parau i te mau parau 'ino 'o tei fa'a'ino'ino iāna.

'Ua parau atu vau i tō'u 'orometua ha'api'i 'e 'ua ani au i tō'u hoa 'ia ha'uti nā muri iā'u. 'Ua fa'a'oa'oa vau i tōu hoa !

Ludmila V., 8 matahiti



'Ua riri au i tō'u metua vahine nō te mea 'aita vau i hina'aro i te hopu i te pape 'e i te haere e ta'oto. I te po'ipo'i a'e, 'ua 'oto vau nō tā'u mā'itira'a 'ino. 'Ua parau mai māmā ē e nehenehe tā tātou e pure 'e e ani i te Metua i te Ao ra 'ia fa'a'ore mai i tā tātou hape. 'Ua tūturi 'e 'ua pure māua. 'Ua huru maita'i a'e au. 'Ua ha'api'i mai au ē e nehenehe tā tātou e tātarahapa, e maoti 'o Iesu Mesia, e nehenehe tā tātou mau hara 'ia fa'a'orehia.

Samuel H., 5 matahiti



Tē vai nei tō'u mau hoa i te fare ha'api'ira'a e 'ere i te melo nō te 'Ēkālesia, tē fa'atura nei rā rātou i tō'u mau ti'ara'a. I te hō'ē taime 'ua parau vau e ti'a ia tātou 'ia pure, 'e 'ua fāri'i rātou ! 'Ua oaoa roa vau.

Ivana A., 11 matahiti



'Ua fa'a'ite au i tō'u 'itera'a pāpū i te fare purera'a. 'Ua ti'a iā'u 'ia itoito ! Mai taua taime ra 'ua 'ite au i te Vārua.

Eliska K., 11 matahiti



Tē pou ra tō'u mau hoa 'e 'o vau i raro I tō mātou taera'a i te 'ē'a uira [ascenseur], 'ua tupu mai te mana'o hepohepo i roto iā'u 'e 'ua ani au i tō'u mau hoa 'eiaha 'ia fa'a'ohipa i te reira. 'Ua fa'aoti rātou i te haere atu. 'Ua haere au nē te 'ē'a I tō'u taera'a atu i



raro, 'aita tō'u mau hoa i tae mai. 'Ua mau te 'ē'a uira ! E mea maoro hou rātou 'a haere mai ai i rāpae'au. 'Ua 'oa'oa vau e 'aita te tahi 'ati i tupu. 'Ua 'oa'oa ato'a vau nō te mea 'ua pe'e au i te Vārua Maita'i.

Amalie N., 10 matahiti

I te taime 'ua ro'ohia tā'u nei fānau'a pua'a i te ma'i, 'ua pure au nōna. 'Ua māuruuru vau i te Metua i te Ao ra nō te tauturura'a mai ia mātou.

Aneta P., 10 matahiti



E HĀPONO MAI IA MĀTOU HŌ'Ē FETI'A !



'Ua fātata mātou i te fa'aoti i te ha'aputuputu i te mau feti'a ! Mai te mea ē 'aita 'outou i hāpono atura i te hō'ē feti'a, e ha'ape'epe'e mai 'e e hāpono mai nā roto i te imere te hōhō'a nō tā 'outou feti'a 'e tā 'outou 'āamu, hōhō'a, 'e te parau fa'ati'a a tō 'outou mau metua i te liahona@ldschurch.org.